



KERKORDE ARTIKEL 1 – AANBEVELINGS EN BESLUITNEMING

AANBEVELINGS:

Die Sinode

1. keur die optrede van die Moderamen goed (vergelyk A, punt 2 in dié verslag);
2. neem kennis van die ASM se *Kommunikasie aan sinodes oor die prosesse tov die wysiging van Artikel 1* met die aangehegte bylaes;
3. neem die voorgestelde Artikel 1 van die Kerkorde amptelik in ontvangs en besluit om dit aan kerkrade en gemeentes vir besluitneming voor te lê, waarna 'n tweede Buitengewone Sinodesitting gehou sal word en die vergadering 'n eie besluit(e) sal neem;
4. gee die ASM se *Kommunikasie aan sinodes oor die prosesse tov die wysiging van Artikel 1* met die aangehegte bylaes, deur aan kerkrade en ringe met die versoek dat elke kerkraad en ring deeglik kennis sal neem van die volledige inhoud van die skrywe en alle bylaes en, in ooreenstemming met die Kerkorde en met inagneming van plaaslike omstandighede, uitvoering sal gee aan die voorgestelde prosesse;
5. versoek kerkrade om in die hantering van die voorgestelde Artikel 1, die deurgang van inligting en die daaropvolgende besluitnemingsprosesse, sorg te dra dat die waardes waartoe die Sinode hom in 2013 verbind het, deurentyd gehandhaaf word, naamlik dat hierdie proses *inklusief, gebalanseerd en vry van dwang sal verloop; eerlik en openhartig; in 'n gees van onderlinge liefde, respek en vertroue; met 'n opregte gebed dat daar heling in ons kerke sal kom; en in gehoorsaamheid aan die Woord en Gees van Christus* (vergelyk die besluit Vrystaat Sinode 2013);
6. versoek ringe om sover dit moontlik is toe te sien dat in alle ringsgemeentes dié waardes toegepas sal word, wat onder andere beteken dat inligting nie eensydig deurgegee word nie, maar volledig sodat kerkrade en lidmate behoorlike deurdagte en ingeligte besluite kan neem;
7. versoek kerkrade en ringe om nougeset toe te sien dat die prosesse kerkordelik korrek hanteer word aan die hand van die riglyne wat vervat is in die skrywe en bylaes van die ASM;
8. beveel aan dat vir die stemming van lidmate, daar eerder gebruik gemaak word van stembriewe en nie elektroniese stemming nie;
9. besluit om op die *Konsepstembrief Belydende Lidmate* 'n ruimte (blokkie) te skep waarbinne die gemeentestempel aangebring moet word voor/met die uitreiking van die stembrief aan lidmate;
10. vestig kerkrade se aandag op die volledige bewoording van die *Konsepstembrief Belydende Lidmate* aangesien lidmate daarmee instemming verleen/nie verleen nie met *die voorstel van die betrokke kerkraad*;
11. wys kerkrade en ringe daarop dat, indien nodig, verdere navrae gerig kan word aan die Algemene Sekretaris, NG Kerk, Posbus 13528, Hatfield, 0028 of u kan u navraag epos aan die Algemene Sekretaris, algemenesinode@ngkerk.org.za;
12. vestig kerkrade se aandag op *Kerkbode*, 1 Augustus 2014, wat in geheel gewy word aan die NG Kerk se belydenisgrondslag en die voorgestelde Artikel 1 van die Kerkorde; en
13. stel die volgende tydraamwerk vas:

- 13.1 29 Julie 2014: Buitengewone Sinodesitting waartydens die ASM se *Kommunikasie aan sinodes oor die prosesse tov die wysiging van Artikel 1* met die aangehegte bylaes in ontvangs geneem word en deurgegee word aan kerkrade en gemeentes vir verdere hantering en besluitneming.
- 13.2 Derde kwartaal 2014: Algemene toeligting en voorbereiding in ringe. Dit kan onder andere geskied by wyse van die beskikbaarstelling van inligtingsmateriaal, inligtingsbyeenkomste in gemeentes, dorpe/stede, streke, ringe, ens. Terselfdertyd word ringe ingelig en toegerus vir hulle rol om te sorg dat die proses kerkordelik korrek verloop, deur plaaslike omstandighede in ag te neem, verteenwoordigers aan te wys om die proses in elke gemeente te monitor, vergader- en stemdatums te koördineer en vas te stel, en terugvoer uit gemeentes/kerkrade te bestuur. 'n Skriftelike verslag oor die vordering hiermee in elke Ring, word aan die begin van September voorgelê aan die Moderamen.
- 13.3 Vierde kwartaal 2014: Stemming deur kerkrade en lidmate. Dit behels die volgende:
- (i) die hou van amptelike kerkraadsvergaderings (gewone óf buitengewone vergaderings in ooreenstemming met die Kerkorde) waartydens kerkrade die Voorgestelde wysiging van Artikel 1 van die Kerkorde amptelik in ontvangs neem en besluit oor 'n tydsraamwerk en prosedures ter inligting van die gemeente;
 - (ii) lidmate wat ingelig word oor die besluitnemingsproses en wat versoek word om by die kerkkantoor of skriba van die kerkraad met sekerheid vas te stel of hul belydende lidmaatskap in die gemeentelike register aangeteken is;
 - (iii) stemming deur lidmate op die vasgestelde wyses en geleenthede, met die stemtelling in die teenwoordigheid van die ringsvertenwoordigers;
 - (iv) 'n tweede amptelike kerkraadsvergadering waartydens kerkrade hul finale besluit neem;
 - (v) daardie finale besluit van die kerkraad wat vir 'n verdere twee Sondae aan die gemeente vir approbasie voorgelê word; en
 - (vi) waarna die kerkraad deur die ringsvertenwoordigers op die voorgeskrewe vorm (Bylaag 3) skriftelik aan die Sinode verslag lewer oor die verloop en uitkoms van die proses in die gemeente. Die verslag moet die skriba van die Moderamen voor/op 5 Desember 2014 bereik.
- 13.4 Eerste kwartaal 2015: Afhandeling van die proses in die Vrystaatse Sinode. Dit behels die verwerking van terugvoer uit die gemeentes, kerkrade en van ringsvertenwoordigers, die hantering van appèlle (indien enige) in Januarie en Februarie 2015. Daarna word 'n verslag voorberei en aan die Moderamen voorgelê, waarna 'n Buitengewone Sinodesitting van die NG Kerk in die Vrystaat 'n eie besluit(e) oor die Voorgestelde Artikel 1 van die Kerkorde sal neem (dit word verwys na die Moderamen om die datum hiervan vas te stel).
- 13.5 31 Maart 2015: Keerderdatum vir die Sinode om sy eie besluit en kerkrade se besluite aan die Kantoor van die Algemene Sinode te besorg.
14. Gee aan die Interimkomitee opdrag om die proses soos uitgespel in 13.1-13.5 te bestuur met verslag aan die volgende Buitengewone Sinodesitting aan die einde van Maart 2015.
15. Gee opdrag aan die Interimkomitee om alle skakeling met die pers te hanteer rakende die proses.

BESLUIT:

Die Sinode keur al die aanbevelings goed.